

Ženska Mentorska Mreža: Program osnaživanja mladih, budućih liderki u Bosni i Hercegovini

Zvanično otvorena peta sezona prepoznatljivog mentorskog programa u organizaciji Addiko Bank Sarajevo i Deloitte BiH. Partner projekta i ove godine je UNDP.

U prethodnoj sedmici je zvanično otpočeo peti ciklus Ženske Mentorske Mreže, jedinstveni program posvećen osnaživanju mladih žena na početku profesionalne karijere. I ove godine, program će okupiti ambicione učesnice iz različitih poslovnih sektora i povezati ih sa iskusnim mentoricama iz svijeta preduzetništva i poslovnog liderstva.



Cilj programa je jasan i snažan: pružiti mladim ženama alate, znanje i samopouzdanje koje im je potrebno za siguran i samouvjeren korak ka ostvarenju profesionalnih ciljeva. Kroz strukturirani mentorski rad, učesnice imaju priliku raditi na konkretnim ciljevima i izazovima, razvijati leaderske i komunikacijske vještine te izgraditi mrežu podrške i kontakata koja će im biti značajna tokom cjelokupne karijere.

Od osnivanja do danas, kroz Žensku Mentorsku Mrežu je prošlo više od 200 mladih žena koje su kroz ovaj program unaprijedile ne samo svoja znanja, već i viziju vlastite karijere. Povratne informacije učesnica potvrđuju snažan uticaj koji program ima na njihov profesionalni i lični razvoj, čineći ga jednim od najznačajnijih lokalnih inicijativa te vrste.

Otvaranje pete sezona programa obilježile su inspirativne poruke osnivačica programa, Sanele Pašić, Članice NO Addiko Bank d.d. Sarajevo i Profesorice na Univerzitetu Sarajevo School of Science and Technology, Sabine Softić, Odgovorne partnerice za Deloitte BiH, Jasmina Spahića, Predsjednika Uprave Addiko Bank d.d. Sarajevo i Renaud Meyera, Rezidentnog predstavnika UNDP-a u BiH. U svojim

obraćanjima naglasili su koliko je važno nastaviti ulagati u zajedništvo i uzajamnu podršku među ženama, te da ova inicijativa već pet godina potvrđuje kako istinska promjena potiče upravo u zajednicama koje vjeruju u potencijal svojih članica.

„Kada smo pokretali ovaj program vodila nas je snažna ideja, a to je da mlade žene u našoj zemlji zaslužuju podršku, priliku i vjeru u vlastite sposobnosti. Danas, pet ciklusa kasnije, uvjerena sam više nego ikad da ulaganje u mlade žene na početku karijere nije samo ulaganje u pojedince, već i u budućnost naše zajednice i ekonomije. Program Ženska Mentorska Mreža je prostor gdje se prenosi znanje, gradi međusobna podrška i gdje se oblikuju buduće liderke koje će donositi pozitivne promjene.“, istakla je Sanela Pašić.

“Kroz godine profesionalnog angažmana, uvjerila sam se koliko je važna prava podrška u pravom trenutku, posebno za žene koje tek započinju svoju karijeru. Upravo zato vjerujem u snagu ovog programa. Ženska Mentorska Mreža stvara prostor u kojem se znanje, iskustvo i samopouzdanje prenose dalje, ali i gdje i same mentorice rastu kroz razmjenu i inspiraciju. Ponosna sam što ovaj program iz godine u godinu okuplja žene koje su spremne ulagati svoje vrijeme, energiju i znanje u to da druga žena uspije, i u tome vidim njegovu istinsku vrijednost.”, dodala je Sabina Softić.



Predsjednik Uprave Addiko Bank d.d. Sarajevo, Jasmin Spahić, pružio je podršku petoj sezoni programa, te je prilikom svog obraćanja istakao:

„Addiko Bank Sarajevo, kao društveno odgovorna banka, sa zadovoljstvom pruža podršku inicijativama koje imaju ključnu ulogu u osnaživanju mladih i stvaranju održivog društva. Vjerujemo da programi ovog karaktera, koji su fokusirani na razvoj budućih liderki, imaju dugoročan uticaj na cjelokupnu zajednicu i ekonomiju naše zemlje.

Tokom ceremonije otvaranja, istaknut je značaj partnerstva u ženskom osnaživanju i ostvarivanju ciljeva programa.

„Pravo liderstvo počinje kada se potencijal susretne s prilikom - a upravo to pruža Ženska Mentorska Mreža. Ovaj program nije samo mentorstvo, već prostor solidarnosti, učenja i lične transformacije. Ulaganjem u mlade žene danas, oblikujemo inkluzivno i otporno liderstvo koje će sutra voditi Bosnu i Hercegovinu. UNDP je ponosan na dugogodišnju saradnju i na održivost ove inicijative koja konkretno odgovara na jedan od ključnih izazova istaknutih u našem najnovijem Izvještaju o humanom razvoju - rodni jaz u ekonomskom učešću. Nakon pet ciklusa, poruka je jasna: kada žene podržavaju žene, mijenjaju se i sistemi“, izjavio je Renaud Meyer, rezidentni predstavnik Razvojnog programa Ujedinjenih nacija u Bosni i Hercegovini.

Partner programa Ženska Mentorska Mreža je UNDP, a dodatnu podršku pružili su: EFSE, UN Women, OSCE, UNFPA i Sarajevo School of Science and Technology (SSST). Medijski partner projekta je magazin Forbes BiH.